


TEZAUUR LITURGIC
9 SEPTEMBRIE

ACATISTUL
SF.CUVIOS
IOSIF
DE LA
VOLOKOLAMSK



MOSCOVA, 2000



Акафист

святому преподобному Иосифу, игумену Волоколамскому, чудотворцу

Кондак 1

Избранный угодниче Христов и дивный благочестия подвижниче, преподобне отче Иосифе, иже сугубый свыше дар приемый боговедения же и исцелений, яко имеяй дерзновение ко Святей Троице моли избавитися нам от находящих бед и скорбей и болезней, да любовьию зовем ти:

Радуйся, преподобне отче Иосифе, богомудре, чудотворче.

Икос 1

Ангела во плоти тя ведуще, преподобне Иосифе, посланна от Бога, да явит тобою в человецех образ истиннаго благочестия и добрых дел, чудящися путем Его, во временнем житии твоём явленным, и величие благоутробия Его

прославляюще, во умилении сердечном взываем
ти сице:

Радуйся, добраго корене отрасли благородная;
радуйся, лозо винограда Христова
многоплодная.

Радуйся, чадо молитвы родителей
благочестивых;

радуйся, надеждо и утешение сердец их
боголюбивых.

Радуйся, издетска страх Господень стяжавый;
радуйся, семя слова Божия от юности
восприявый.

Радуйся, измлада смирения и молчания
хранителю;

радуйся, молитвы и воздержания ревнителю.

Радуйся, преподобне отче Иосифе, богомудре,
чудотворче.

Кондак 2

Видя Христос благое сердца твоего изволение
и рачение, яко от юности немолчно прославлял
еси Имя Господне чтением и пением псалмов и
песней священных во святем храме Его, в
скинии небесней вчини тя, преподобне, в лице

праведник совершенных возносить ему купно с ними ангельское пение: Аллилуиа.

Икос 2

Разумев от писаний отеческих благих мира сего тщету, исход же от временного сего жития непрестанно помышляя и пребывая присно в сокровенном подвиге молитвы, никакоже сердцем прилепился еси к сущим от мира, разве точию к единому достойнейшему от сверстников твоих, с нимже и путь богоугодного иноческого жития от дней отрочества предъизбрал еси, преподобне. Темже ублажаем тя сице:

Радуйся, цвете благоуханный доброго воспитания;

радуйся, сосуде Божественного избрания.

Радуйся, в разуме Богом просвещенный;

радуйся, сердцем в Бозе утвержденный.

Радуйся, образе содружества непорочного и нелестного;

радуйся, вседушевно взыскавый Царствия Небесного.

Радуйся, преподобне отче Иосифе, богомудре, чудотворче.

Кондак 3

Бурю помышлений мирских препобеждая
благодатию Христовою, помыслом лучшим
востекл еси к Небесным, преподобне, в Горняя
вперив ум твой безмятежный и безстрастный, и
волю всецело покорив под иго Христово, тело же
твое соделал еси жилищем Духа Святаго,
отнюдуже и в телеси, яко безплотен, со
безплотными взывал еси Богу: Аллилуиа.

Икос 3

Ревность имеяй о совершенном житии
христианством и от писаний отеческих научен,
еже вдати себе в послушание искусну
руководителю и наставнику неслестну, в юности
родители твоя оставил еси, преподобне, и
положил еси в сердца твоем воспросити
духовнаго старца Варсонофия, да еще что речет,
буди то тебе, яко слово Самаго Бога, еже и
свершися во благое Божиим устроением; сего
ради, толикое веры твоея упование ублажающе,
взываем ти:

Радуйся, яко любезная и красная мира сего
презрел еси;

радуйся, яко Небесных и нетленных
желанием вождедел еси.

Радуйся, внутреннею Креста Христова
красотою восхищенный;

радуйся, силою Свыше на труд
крестоношения облеченный.

Радуйся, волею твердою воли своея
отрекийся;

радуйся, отсечением страстей угодивый Богу
и спасыйся.

Радуйся, преподобне отче Иосифе, богомудре,
чудотворче.

Кондак 4

Силою любви Божия влеком к вящшему
жития иноческаго совершенству и мудре
последуя совету и благословению прозорливаго и
святаго старца Варсонофия, пришел еси во
обитель преподобнаго Пафнутия и того умолил
еси прияти тя в послушание, да купно с ним в
трудех и подвизах выну благоугождай Богу,
воспеваеши: Аллилуиа.

Икос 4

Провидя духом благое произволение юноши, чистоту же душевную и благодатное призвание его, преподобный Пафнутий абие облече его во иноческий образ и возложи на нь иго послушаний, яже со усердием в простоте и в терпении мнозе исполняше, яко быти ему образом безпрекословного повиновения, труда и благочестия; темже ныне зовем ему сице:

Радуйся, тесный путь спасения от юности возлюбивый;

радуйся, ярем Господень на выю свою возложивый.

Радуйся, священными обеты волю свою связавый;

радуйся, себе и весь живот свой Господеви предавый.

Радуйся, коемуждо во благо усердный служителю;

радуйся, болящих и немощных успокоителю.

Радуйся, помыслы плотския силою молитвы прогоняяй;

радуйся, сомнящихся в вере словом Божиим утверждаяй.

Радуйся, преподобне отче Иосифе, богомудре, чудотворче.

Кондак 5

Божественною любовью распалаем и ближних твоих, иже в мире, не отверглся еси сердцем, преподобне: слышав бо старца отца твоего в расслаблении телесном суща, умолил еси преподобнаго Пафнутия во обитель того прияти и надолзе послужил еси болящему родителю твоему, со всяким рачением призирая его и питая телесне рукама твоима и духовне словом Божиим до самыя кончины, яко тому взывати к тебе: Не аз ти отец, но ты ми отец еси. Сей убо труд любви твоея сыновния восхваляюще, яко жертву богоприятну, поем: Аллилуиа.

Икос 5

Имый во обители осмьнадесять лет жития в послушании, бдении, пощении и научении писанием святых и духоносных отец, егда наста час блаженныя кончины преподобнаго Пафнутия, начальствовать по нем, аще и не хотяй, призван был еси и во пресвитера

поставлен, да управиши добре собранное им стадо Христово; ты же в мале начальствовав, паки управляем восхотел еси быти, да приумножиши добродетелей нетленная сокровища. Темже, дивящися ревностному добротолюбию и смиренномудрию твоему, вопием ти:

Радуйся, лишении телесными многа блага духовная собравый;

радуйся, нищетою дарования Небесная стяжавый.

Радуйся, молчания изрядный хранителю;

радуйся, строгий уставов иноческих блюстителю.

Радуйся, болящим, яко братии Христовой, послуживый;

радуйся, высокий образ любви сыновняя явивый.

Радуйся, власти над другими и чести уклонивыйся;

радуйся, паки, яко слуга незнаемь, во обитель Кириллову вселивыйся.

Радуйся, тамо брашна уготовляти определенный;

радуйся, и в рубище рабством познанный и обличенный.

Радуйся, преподобне отче Иосифе, богомудре, чудотворче.

Кондак 6

Купцу уподобился еси, ищущему доброго бисера, Иосифе преподобне, егда в послушании и всяцем подвиге духовнем благоискусен быв, обители иноческия посещал еси: да испытно познаеши в тех лучшая и совершеннейшая и приусвоиши на пользу душ стада твоего словеснаго, еже радостию велиею возрадовася возвращению твоему, благодарственне взывая Пастыреначальнику Христу: Аллилуиа.

Икос 6

Слышав благоверный князь Борис о пришествии преподобнаго Иосифа в его пределы, изшед усердно моляше и, да изберет в его наследии место, да соградит на нем святую обитель и пребывает в ней со иноки, еже и свершися, дыханию бурну указующу место, и устройся рачением князя, паче же благословением Божиим по молитвам преподобнаго, емуже с любовью взываем сие:

Радуйся, высоких подвигов жития
христианского ревнителю;

радуйся, новоначальных искусный
руководителю.

Радуйся, неизменное правило поста и
покаяния;

радуйся, хранителю непрестанного
воздержания.

Радуйся, мирским наставниче жизни
богоугодныя;

радуйся, основателю обители благоплодныя.

Радуйся, яко благая начинания твоя Христос
благослови;

радуйся, яко сотрудника тебе в лице
державнаго яви.

Радуйся, преподобне отче Иосифе, богомудре,
чудотворче.

Кондак 7

Велие стяжав сокровище любви, преподобне,
якоже во дни первых христиан, имже бе сердце
и душа едина и от нихже никтоже от имений
глаголаше что свое быти, судил еси и во иноцех
обители твоея, яко изволением сердца

отвергшихся мира и его стяжаний, уставити сицеваго жительства образ, да вси вкупе едино възыщут стяжание вечное, Бога, Емуже и да възывают выну: Аллилуиа.

Икос 7

Новаго Феодосия, общих житий начальника, зрит в тебе страна Российская, преподобне отче Иосифе, якоже бо той, иноческия обеты восприяв, всем сердцем и душою уставом общаго иноческаго жития предан баше, сице и ты, сим шествуйи путем, в терпении мнозе заповедем общежития святых отец неуклонно последовал еси, темже от чтущих тя слышиши таковая:

Радуйся, общее житие монашествующих основавый;

радуйся, тем всеоружие благочестия им подавый.

Радуйся, общими труды праздных помыслов шатания упразднивый;

радуйся, теми, яко бронею, страстей разжженные стрелы отразивый.

Радуйся, вселивый во обители дух общаго воздержания;

радуйся, потребивый в ней плевелы
любостязания.

Радуйся, бодрствованию духовному многи
иноки научивый;

радуйся, до конца жития первый в
труждающихся бывый.

Радуйся, преподобне отче Иосифе, богомудре,
чудотворче.

Кондак 8

Странник пришел еси в пустыню отечества
твоего, преподобне, и абие домовладыка явился
еси Богу, преклоньшу сердце во власти сущаго
благовернаго князя Бориса еже послужити от
имений своих на созидание церкви каменные на
месте сем, благоукрасити же ю боголепно, и
келлии воздвигнути множащимся братиям, да и
зде сими, яко на небеси святыми Ангелы,
возносится Богу песнь: Аллилуиа.

Икос 8

Видяще ревностное по Бозе и жестокое
житие преподобнаго Иосифа и братии,
непрестанно в трудех и пощении
подвизающихся и ходящих в рубищных и худых
одеждах, нецыи от инок и всякаго чина мирских

людей и князей не точию сих не отвращахуся,
но паче равностию духовною горяще и во
обители купно с ними подвизатися желающе,
приношаху ту имения своя на пользу общую;
темже здателю той возглашаем тако:

Радуйся, мудре предначертавый обитель
нову;

радуйся, поревновавый нищетолюбному
житию Христову.

Радуйся, святые храмы во обители создавый;
радуйся, мног собор монашествующих
собравый.

Радуйся, яко труд твой свыше благословися;
радуйся, яко святое желание сердца твоего
совершися.

Радуйся, яко во обители твоей мнози души
своя спасоша;

радуйся, яко из нея пастыреначальницы
изыдоша.

Радуйся, преподобне отче Иосифе, богомудре,
чудотворче.

Кондак 9

Всем сердцем возлюбивый Бога и многа дарования духовная от Него восприемый, преподобне Иосифе, и пред человеки толику благодать обрел еси, яко не точию мнози от простых, но и князи, требующе твоих наставлений, в послушание тебе вдаяху себе совершенно, имже миротворец был еси, исходатайствовав благоволение самодержца князю Юрию, иже неповинне оклеветан под страхом смертным бяше, избавлен же быв в радости душевной возопи Богу: Аллилуиа.

Икос 9

Благодать Божественная, привлекаемая молитвами преподобнаго, яве знаменася в нем даровании чудотворений и ведением сокровенных: умерша бо благочестиваго князя Иоанна молитвою своею возбуди, да конечно предуготовится покаянием и восприимет залог жизни вечныя, и тако да отыдет ко Господу; темже во гресех живущии и действенаго возбуждения на покаяние требующии возопиим к нему:

Радуйся, благочестивых отрадо и утешение;

радуйся, колеблющихся в вере твердое
ограждение.

Радуйся, отчаявающихся утверждая во
уповании;

радуйся, просветивый многих твоими
писании.

Радуйся, мир посреде враждующих устрояя;
радуйся, неповинныя от смерти избавляя.

Радуйся, умирающих возставляя на
покаяние:

радуйся, всем внушая жизни вечныя
взыскание.

Радуйся, шествовавый путем трудным и
тесным;

радуйся, возводя к обителем
небесным.

Радуйся, преподобне отче Иосифе, богомудре,
чудотворче.

Кондак 10

Новоустроенну обитель преподобнаго Иосифа
испыта Господь посещением гнева Своего, купно
же и милости: за грехи бо людския глад крепок
наведе на землю Волоколамску и на вся

окрестныя веси, яко многим людем безгодно погибати. Преподобный же, уведев сия, усугуби во обители моление и отверзе житницы тоя алчущим; раздав же вся сущая и не могый ктому не точию тысящ пришедшаго народа, но ниже братии своя препитати, посла заимовати на обитель сребро и куплю деяй семен хлебных, никакоже остави требующия погибати голодом, детем же их малым особь созда дом, дондеже державный благочестивый царь Василий, слышав сия, внезапно прииде во обитель и дарова довольная ко призрению бедствующих, иже, видяще в сем милосердную руку Божию, во умилении сердец вознесоша хвалебный глас Богу: Аллилуиа.

Икос 10

Благому изволению державнаго последующе, мнози от военачальник и князей удельных и иных христолюбцев богатая даяния в обитель Иосифову приношаху, яко всем пришедшим к ней глада ради безбедно в дома своя возвратитися и новым изобилием благословится обители преподобнаго, к немуже взываем ныне:

Радуйся, надеждо светлая в нужде и
обстоянии сущих;

радуйся, покровителю сирых и крова
неимущих.

Радуйся, голодом погибающих питателю;

радуйся, чадом их виталища созидателю.

Радуйся, милости источниче неистощимый;

радуйся, скорбящих утешителю незримый.

Радуйся, последняя твоя взаим Богови
давый;

радуйся, добрым расточением сущих богатая
собравый.

Радуйся, преподобне отче Иосифе, богомудре,
чудотворче.

Кондак 11

Ведый от Божественных писаний, яко един
уповающий на Господа поженет тысящи, и два
двигнета тмы, не убоялся еси, преподобне, един
со святым Геннадием сонмищу сильных
поборников суетных лжеучений противустати; и
оружием истины в конец сих поразил еси: вси бо
разсеяшася, яко прах пред лицом ветра, тебе же

благодарственно сердцем и усты зывающу:
Аллилуиа.

Икос 11

Веруай в Мя,— рече Господь,— реки от чрева
его истекут воды живы. Сия убо в тебе
оправдишася, досточудне Иосифе, не бо
священным догматом богословия во училищи
некоем наставлен был еси, но сам живою верою
сердца взыскуай Бога, истину обрел еси в слове
Божии и писаниих отеческих и явился еси оплот
необорим Православия. Темже зываем ти:

Радуйся, лжеучителей злых лукавство
разоривый;

радуйся, сомнящихся в православней вере
утвердивый.

Радуйся, бодрый учения Христова
защитниче;

радуйся, боголюбивою ревностию
возжженный светильниче.

Радуйся, благопотребне во отечествии твоём
возсиявый;

радуйся, веру в делех жития твоего
показавый.

Радуйся, разумных и препростых
благоискусный учителю;

радуйся, ближних и дальних россиян
просветителю.

Радуйся, преподобне отче Иосифе, богомудре,
чудотворче.

Кондак 12

Миру водворившуся в Церкви дух злобы
паки, пакости дея, подвигну сердце волоцкого
владельца корысти ради многа смущения и
утеснения творити обители, еще же и осуждение
неправедно воздвигнути на преподобнаго, еже и
паде на главу осудившаго; собором бо
священным преподобный Иосиф с великою
честью оправдан бысть, присно воспеваяй Богу:
Аллилуиа.

Икос 12

Течение жития скончавая в трудах и
молитвах, и подвизах благочестия, завеща
преподобный неизменно хранить преданный им
устав знаменательне прирек: аще получу от Бога
милость, то обитель сия ничимже скудна будет,
и тако, завесу плоти отложив, отыде ко Господу
и по сих исцеления подаваше больным,

приходящим с молитвою к его мощем. Сего ради приносим ему похваления таковая:

Радуйся, чистоты душевныя хранителю
нелицемерный;

радуйся, истинный рабе Христов благий и
верный.

Радуйся, стрелами вражиих навет
неуязвимый;

радуйся, спасаемых вождю непобедимый.

Радуйся, досточудный образе терпения;

радуйся, наставниче нелицемерного
благоговения.

Радуйся, и по отшествии обитель твою
соблюдая;

радуйся, молящимся благопотребная
подавая.

Радуйся, от Господа венец правды
восприявый;

радуйся, славою чудотворений просиявый.

Радуйся, преподобне отче Иосифе, богомудре,
чудотворче.

Кондак 13

О преподобне и богоносне отче Иосифе! Воспоминающе ныне подвиги и труды твоя, яже о Христе содеянная, мы, грешнии и недостойнии раби твои, смиренно просим тя: моли милостиваго Бога, да дарует мир жительству нашему и Церкви Своей Святей, да оградит ю от всех душепагубных и безбожных учений, да подаст же нам вся благопотребная в житии сем, и в будущем веце да сподобит нас воспевати Ему: Аллилуиа.

Этот кондак читается трижды, затем 1-й икос «Ангела во плоти...» в 1-й кондак «Избранный угодниче...».

Молитва первая

О великий наставниче, ревнителю и учителю православныя веры, святе премудре Иосифе! Приими моление нас, грешных, тебе приносимое, и теплым предстательством умоли в Троице славимаго Бога, да ниспослет богатая Своя милости нам, грешным, да утвердит во Святей Своей Православней Церкви правую веру и благочестие: пастырем ея да подаст

святую ревность о спасении словеснаго стада, яко да верующих соблюдут, неверующих же и отпадших от истинныя веры вразумят и обратят. Всем же нам испроси вся благопотребная во временнем сем житии и полезная к вечному спасению нашему. Помяни стадо твое, еже собрал еси, не забуди посещати чад твоих и, яко чадолюбивый отец, не презри, ниже отрини моления наша, но воздежи руце твои молитвенней ко Господу Богу, да отложит праведный гнев Свой, движимый на ны, и избавит нас от враг видимых и невидимых, от глада, потопа, меча, смертоносныя язвы, нашествия иноплемennных и междоусобныя брани. Ей, премилосердый заступниче наш, преславный чудотворче, всех нас управи в мире и покаянии скончати живот наш и преселиться со упованием в блаженная селения райския, идеже непрестанно славословится всепетое Имя Отца и Сына и Святаго Духа. Аминь.

Молитва вторая

О преблаженне и приснославне отче наш Иосифе! Ведуще твое велие к Богу дерзновение и к твоему твердому заступлению прибегающе, в сокрушении сердца молим тя, озари нас светом

дарованныя тебе благодати и молитвами твоими помози нам бурное море жития сего прейти безмятежно и пристанища спасения неблазненно достигнути: порабощени бо суще суетными, и грехолюбиви, и немощни еже от обышедших нас зол возникнуть, к кому прибегнем, аще не к тебе, явившему неоскудеваемое богатство милости в земнем житии твоём? Веруем же, яко и по отшествии твоём множайшее стяжал еси дарование милосердовати бедствующим. Темже убо, припадающе ныне к цельбоносней иконе твоей, умиленно просим тя, святче Божий: сам искушен быв, помози и нам, искушаемым; постом и бдением поправый силу демонскую, и нас от нападений вражиих защити; препитавай гладом погибающих, и нам испроси у Господа изобилие плодов земных и вся яже ко спасению потребная; посрамивый еретическая мудрования, Церковь Святую от ересей и расколов, и смущений молитвами твоими огради: да тожде мудрствуем вси, единем сердцем славяще Святую, Единосущную, Животворящую и Нераздельную Троицу, Отца и Сына и Святаго Духа, во вся веки. Аминь.



ПОЛНЬІЙ АКАФИСТНИК КАНОНИЧЕСКІЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО